

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.10 रविवार

दिनांक 16.03.2025

\*\*\*\*\*

प्रमुख समाचार –

- 1— आज देस भर म राष्ट्रीय टीकाकरण दिवस मनाय जात हे।
- 2— मुख्यमंत्री ह आज जशपुर म विमान उड़ान प्रसिक्षण के करीन सुभारंभ— उन्हें, बार काउंसिल के जीर्णोद्धार ई—लाइब्रेरी बनाय बर एक करोड़ रुपिया देके करीन घोसना।
- 3— कोरिया जिला के सोनहत थाना क्षेत्र के कटगोड़ी गांव म दू फटफटी के बीच होय टक्कर म चार जिन मनखे के मउत होंगे अउ एक गंभीर रूप ले घायल।

समाचार विस्तार ले .....

राष्ट्रीय टीकाकरण दिवस

आज देस भर म राष्ट्रीय टीकाकरण दिवस मनाय जात हे। ए दिन टीकाकरण के महत्ता बताय अउ लोगन ल जागरूक करे खातिर हर बछर सोला मार्च के मनाय जाथे। केंद्रीय स्वास्थ्य मंत्रालय ह सोसल मीडिया पोस्ट म बताय गेहे हे कि देस के हरेक लइका के स्वास्थ्य सुरक्षा के लक्ष्य हासिल करे बर टीकाकरण जरूरी हे। मंत्रालय ह बताय हे कि राज्य सरकार अउ समर्पित अग्रिम पंक्ति के स्वास्थ्य कार्यकर्ता मन संग मिलके सरकार लइका मनके रोग—प्रतिरोधक क्षमता बढ़ाय बर प्रतिबद्ध हवय।

संपूर्ण टीकाकरण के तेजी ले बढ़वार बर बछर दू हजार चौदह म मिसन इंद्र धनुष के सुरुआत करे गे रिहीस। एखर उद्देश्य नान्हे लइका मनके मृत्युदर म कमी लाना अउ सबो लइका म टीकाकरण ल प्रभावी बनाना रिहीस।

प्रसार भारती—हॉकी पुरस्कार

नई दिल्ली म काली हॉकी इंडिया के सातवां वार्षिक पुरस्कार म प्रसार भारती ल बछर दू हजार चौबीस म हॉकी के प्रसारण अउ संवर्धन ह योगदान दे खातिर जमनलाल शर्मा पुरस्कार ले सम्मानित करे गीस। समारोह म पचास बछर पहिली पंद्रह मार्च के ही कुआलालम्पुर म भारत ल विश्वकप जीतइया अजीतपाल सिंह के अगुवाई वाले भारतीय टीम ल पचास लाख रुपिया नगद रकम के संग ध्यानचंद लाइफटाइम अचीवमेंट पुरस्कार दे गीस।

पेरिस ओलंपिक म कांस्य पदक जीतइया भारतीय हॉकी टीम के कप्तान हरमनप्रीत सिंह ल बछर दू हजार चौबीस के सर्वश्रेष्ठ पुरुष खिलाड़ी के पुरस्कार मिलिस अउ महिला हॉकी टीम के गोल कीपर सविता पूनिया ल सर्वश्रेष्ठ महिला खिलाड़ी के बलबीर सिंह सीनियर पुरस्कार दे गीस।

मुख्यमंत्री—विमान उड़ान प्रसिक्षण

मुख्यमंत्री विष्णुदेव साय ह आज जशपुर म विमान उड़ान प्रसिक्षण के सुभारंभ करीन। ए दउरान मुख्यमंत्री ह आगडीह हवाई पट्टी म तीन सीजी एयर स्क्वाड्रन एनसीसी रईपुर के कैंडेट मन ले भेंट करके उंखर उछाह ल बढ़ाइन। ओमन कैंडेट मनके अनुभव सुने अउ जशपुर म पहिली घांव सुरु होय विमान उड़ान प्रसिक्षण ल ए ऐतिहासिक पहल बतइन। ओमन किहीन कि जशपुर अब सिरिफ पर्यटन अउ प्रकृति के सुघरई के केंद्र नो हे, भलूक विमानन प्रसिक्षण के नवा हब बनत हे। मुख्यमंत्री ह किहीन कि अब युवा पायलट बने के सपना साकार कर सकत हे। जेखर बर सरकार हर संभव मदद देवाही। मुख्यमंत्री ह ए मउका म माइक्रोलाइट एयर स्क्वाड्रन विमान ल देखिन अउ ओखर तकनीकी जानकारी दीन।

खबर के मुताबिक जशपुर जिला म सात मार्च ले कैडेट मन ल विमान उड़ाये के प्रसिक्खण दे जात हे। ए दउरान विमान आकाश म उड़ान भरे के बाद सुरक्षित लैंड करत हे। जेखर ले कैडेट मन ल व्यावहारिक अनुभव मिलथे। रईपुर के संगेसंग जशपुर जिला म भी अइसन कीसम के प्रसिक्खण कारीकरम राखे गेहे।

उहें, मुख्यमंत्री ह आज जिला व्यवहार न्यायालय जशपुर म जिला अधिवक्ता संघ के नवा बने पदाधिकारी मनके सपथ ग्रहण समारोह म संघरीन। ए बेरा म मुख्यमंत्री ह बार काउंसिल के जीर्णोद्धार ई-लाइब्रेरी बनाय बर एक करोड़ रुपिया देके घोसना करीन।

### मुख्यमंत्री-जशपुर शपथ ग्रहण

मुख्यमंत्री विष्णुदेव साय के मौजूदगी म नगर पालिका परिषद, जशपुर नगर के नवा बने अध्यक्ष अरविंद भगत अउ बीस टिन वार्ड के पार्षद मनके सपथ ग्रहण समारोह आज जशपुर म होइस। ए मउका म मुख्यमंत्री ह किहीन कि नगर के साफ-सफाई बेवस्था करे बर पार्षद अपन मिहनत अउ जिम्मेवारी के संग काम करय। मुख्यमंत्री ह नवा बने पार्षद मनले स्वच्छता बुनियादी सुविधा अउ स्मार्ट सहर बनाय म अपन महत्ता के भूमिका निभाय के आह्वान करीन। ओमन किहीन कि स्थानीय प्रशासन अउ नागरिक मनके मदद ले जशपुर नगर ल आदर्स नगर बनाय जाही।

### राज्यपाल-दौरा

राज्यपाल रमेन डेका दू दिन के दउरा म आज कोरबा पहुंचिन। एनटीपीसी गेस्ट हाउस कावेरी भवन म कलेक्टर अजीत बसंत अउ पुलिस अधीक्षक सिध्दार्थ तिवारी ह उंखर सुवागत करीन। ए दउरान राज्यपाल ल गार्ड ऑफ ऑनर दे गीस। राज्यपाल रमेन डेका सत्रह अउ अट्टारा मार्च के जांजगीर-चांपा जिला के दउरा म रइही।

### ट्रेन-हादसा

कोरबा जिला के दीपका एसईसीएल साइडिंग म आज रेलवे क्रॉसिंग म जावत मालगाड़ी ल एक तेज रफ्तार ट्रक ह टक्कर मार दीस। ए टक्कर के बाद मालगाड़ी के गार्ड ब्रेक के डिब्बा पटरी ले उतर गे। ए घटना म ट्रक ड्राइवर गंभीर रूप ले घायल होगे हे। ए घटना के सूचना मिलतेच कोरबा रेलवे प्रबंधन अउ रेलवे पुलिस मउका म पहुंचिन अउ मामला के जांच म जुटे हे।

### दुर्घटना

कोरिया जिला के सोनहत थाना क्षेत्र के कटगोड़ी गांव तीर दू फटफटी सवार के बीच होय टक्कर म चार झिन युवक मनके मउत होगे। ए घटना काली संझा के हरय। बताय जात हे कि ए फटफटी म तीन झन दूसर फटफटी म दू झिन बइठे रिहीन। दूनों फटफटी के बीच टक्कर होइस, जेमा चार झन के मउकच म मउत होगे। उहें, एक युवक गंभीर रूप ले घायल हे, जउन ल अस्पताल म भर्ती कराय गेहे। मउत होय लोगन कछार मधला अउ कुसमहा गांव के रहवइया बताय गेहे।

उहें, दुरुग जिला म चौदह तारिख के होय रद्दा दुर्घटना म भाजपा महिला मोर्चा जिलाध्यक्ष के घायल बेटी के रईपुर के एक प्राइवेट अस्पताल म इलाज चलत रिहीस हे, जिहां आज ओखर मउत होगे।

### गांजा-बरामद

रईपुर पुलिस ह एक बिसेस अभियान के दउरान छै तस्कर मन ल गिरफ्तार करे के संगेसंग उंखर तीर ले करीबन सात कुंटल गांजा जब्त करे हे। पुलिस के मुताबिक ए गांजा ओडिसा के रायगड़ा ले इंहा लात रिहीन हे। जब्त करे गे गांजा के कीमत करीबन सत्तर लाख रुपिया बताय गेहे।

## आबकारी आरक्षक भर्ती

छत्तीसगढ़ आबकारी विभाग म दू आबकारी आरक्षक के भर्ती के कामकाज जल्दी सुरु होवइया हे। व्यवसायिक परीक्षा मंडल कोति ले ए भर्ती बर लिखित परीक्षा ले जाही। व्यापम कोति ले जल्दीच अर्जी लेके काम अउ परीक्षा के तारीख के घोसना घलो करे जाही।

## प्रधानमंत्री-मन की बात

प्रधानमंत्री नरेन्द्र मोदी तीस मार्च के आकाशवाणी ले “मन की बात” कारीकरम म देश-विदेश के लोगन संग अपन बिचार साझा करही। ए मासिक रेडियो कारीकरम के एक सौ बीसवां कड़ी होही। लोगन मन ए कारीकरम बर अपन बिचार अउ सुझाव टोल फ्री नंबर – एक आठ शून्य शून्य – एक एक – सात आठ शून्य शून्य ले दे सकत हे। अपन सुझाव नरेन्द्र मोदी ऐप या माय जीओवी ओपन फोरम ले ऑनलाइन घलो साझा कर सकत हे। सुझाव ए महिना के अट्ठाईस तारीख तक मंजूर करे जाही।

## होली-बीएसएफ

दुरुग जिला रिसाली के सीमा सुरक्षा बल के सीमांत मुख्यालय म होली मनाय गीस। ए बेरा म सीमा सुरक्षा बल के महानिरीक्षक आनंद प्रताप सिंह ह जवान मन संग गोठबात करत किहीन कि होली सिरिफ रंग के तिहार नो हे, भलूक भाईचारा मया प्रेम के प्रतीक हे। ओति, कांकेर जिला के माओवाद प्रभावित क्षेत्र सीमा सुरक्षा बल के कोदापाखा कैंप म होली मिलन कारीकरम राखे गीस। ए दउरान बीएसएफ के पुलिस महानिरीक्षक आनंद प्रताप सिंह ह जवान मनके बीच पहुंच के उंखर हिम्मत बढ़ाइन।

ओमन किहीन कि सीमा सुरक्षा बल के ए आयोजन अपन जवान मन ल सामाजिक अउ सांस्कृतिक जुड़ाव के अनुभव देके परयास हे। ए कारीकरम म बीएसएफ के उप महानिरीक्षक ओमप्रकाश अउ आने बड़का अधिकारी मौजूद रिहीन।

\*\*\*\*\*